

Nuuk, ulloq Septembarip 14-t 2016

Inatsisartut suleriaasiat § 37 malillugu, immikkoortoq 1 naapertorlugu matumuuna Naalakkersuisunut apeqqutit imaattut saqqummiuppakka:

Naalakkersuisunut apeqqutit:

1. Illersornissamut isumaqatigiissut naammaginnartinnagu isumaqatigiilluta nalunaareerluta atorunnaarsissinnaavarput? Imaluunniit aatsaat Naalagaaffinngorutta namminerisatsinnik tungaviusumik inatsiseqarluta tamanna pisinnaavaa?
2. Nunatsinnulli iluaqutaasussamik nunatta illersornissaa pillugu tamanut ammasumik isumaqatigiinniarsinnaavugut?
3. Nunanut allanut politikkip nunanut allanut niueqateqarnermut ullutsinni avissaartinneqarsinnaannginneri isumaqatigaajuk?

(Inatsisartunut Ilaasortaq Per Rosing-Petersen, Attaviitsoq)

Tungavilersuut:

Illersornissamut isumaqatigiissut tungavilerneqarpoq 1951-mi uagut minnerpaamilluunniit akuutinneqarata. Nutarterneqarlunilu 2004-mi annikittunnguamik iluaqutaavallaanngittumillu allannguuteqartinneqarluni, tamanna manna tikillugu timitaliinerit paatsoorneqarsinnaanngitsumik takutittuarpaat. Atuuffiani amerlasooriarluta danskiniit salloqittaarineqaannarata qulaatiinnarluta nunarput pillugu aalajangersaanerit imaaginnavittut minnerpaamilluunniit iluaqutigisimanngilagut, killormulli oqartariaqarpugut ajoqutigisimallugit, mingutitsineq annertuupilussuaq ulorianarluinnartorlu assersuutitut taaginnarsinnaavarput. Taamaattumik soorlu USA-mi angalanitsinni ersarissorujummik ataatsimoorussamik aamma tusagaassiorfitsigut oqariartuutigingipput, killiffik akuersaarneqarsinnaanngilaq.

Kissaatigaara apeqqutikka, suleriaaserput malillugu, ullut qulit iluanni akineqassasut.